



Sel Prestuhn Thomas S. Monson

Nuhnkuh Mwe Insewowo uh

Pahpah tuhmasr Inkuhsrao el etuh enenuh lasr uh ac lac tuhlah kahsrwe kuht ke kuht pahnglol ke kahsrueh uh.

Tamuhlwel ac tahmtahel sacohk wiyuck an, toeni se inge akikhlen-yac yac ahk 49 e ke pacl se nga ahkkweyeyucklac ah, ke Ohktohpa 4, 1963, in oruh sie mempucr ke U luhn Mwet Sap Singucul Luo. Yac angaul yuc pacl na loeloes se. Ke ohiyac puhs, tuhsruhktuh, atacn pacl na fototo se ke pacl se nga tulac ke yen in sramsram lun Tabernacle ah ac oruh sramsram se emet luhk ke toeni luhlahp uh.

Puhs ma eklac ke Ohktohpa 4, 1963 me. Kuht moul ke pacl wo se ke sramsram mahtuh luhn facluh. Kuht ahkinsewowoyeyuck yohk na pwacye. Ac inge kuhtuh pacl uh upac in liye ma upac ac insese in lwelah ma koluk in rauni kuhtyak ac tiac oruh in muhnahtlah. Nga konwacack lah, sahyacn nuhnkuh ke ma sruhngwacyuck ke ohiyac se, kuht fin srihke in liye ma uh ke sie liye wo ac nuhnkuh mwe insewowo ke moul lasr uh, weacng mwe insewowo ma atacn srihk kuh mwe insewowo ma kuht kuh in tiac etuh, kuht kuh in konwacack engan luhlahp.

Ke nga liye yac 49 somlah ah, oasr

kuhtuh ma nga konwacack. Sie pa lah puhs puhlakihn luhk ma tiac arlac pa ma kuh in nuhnkweyuck muh ahlukhwelah wo. Ke ma pwacye, ke pacl ma puhlakihn inge sikyak uh, e kwacna atacn tiac oacwac ac finne oacna. Tuhsruhk, esamyacn puhlakihn inge, elos ahkwoye ac ahkinsewowoye moul uh—weacng moul luhk sifacna. Nga ke ahkkweye mukwikwi se pacna inge nuh suwos—ma oacna, ma kowos nuhnkuh muh ahkwoye moul lowos an ac liye na nuh ke mwe insewowo, yohk kuh srihk, kowos eis tari an.

Sifil liye luhk ke yac ekahsr ah me tiac tui ke ahkkweyeyacn etuh luhk lah pruhe lasr uh lohngyuck ac topukyuck. Kuht etuh wo ke ma pwacye sukoyak ke 2 Nephi ke Puk luhn Mormon, ma fahk lah mwet uh oasr elos in kuh in engan.¹ Nga ahkpwacyei lah yohkiyacn engan sacn tuhkuh ke kuht akikhlen lah kuht kuh in sramsram nuh sin Pahpah tuhmasr Inkuhsrao ke pruhe ac lah pruhe ingacn ac tuhlah lohngyuck ac topukyuck—sahp tiac ke ohiyac ac pacl kuht tuhpan uh pa

e topukyuck kac uh, tuhsruhk elos *ac tuhlah* topukyuck sin Pahpah Inkuhsrao se ma etwekuht ac luhngse kuht wo ac suc luhngse engan lasr uh. El olwelah nuh sesr lah kuht fin puhsisac, El ac pwen kuht ac use top ke pruhe lasr uh?²

Ke minit ekahsr tohkoh ma lwelah ngan sramsram uh, nga luhngse akacsruhi nuh suwos kuhtuh srihsrihk oruh luhk ke puhlakihn ma oasr yuruk ke pruhe ma lohngyuck ac topukyucklac ac suc, ke sifil liye-yuck, use mwe insewowo nuh in moul luhk ac oacyacpac moul luhn mwet sahyac. Ma nga sihmihis luhk ke lwen nuh kwewa uh, suhmuhslah ma ke yac somlah ah nuh mihsenge, kahsrueh use kuhtuh ma srihsrihk suc ma nga ac kuh in tiac esam.

Ke muhtuhn yac 1965 nga srihsrngiyucki in wi toeni luhn stek ac in ahkfahsrye miting sahyac ke eria South Pacific nohfohn. Muhtwacta se emet luhk nuh ke ip luhn facluh se, ac pa pacl se ma nga tiac kuh in muhkuhlah uh. Mukwikwi ke ip luhn nguhn pucspucs sikyak ke puhlan kunohkohn se inge ke nga ohsun nuh sin mwet kol, mempucr, ac misineri ac.

Ke kapihn wik ke Sactte ac Sacnri, Fepweri 20 ac 21, kuht oasr fin acn Brisbane, Australia, in ahkfahsrye tuhkweni luhlahp ma orek uh ke Stek Brisbane. Ke puhlan pacl in miting ke Sactte, ahkkahlwemyeyuck nga nuh sin prestuhn luhn tistrik ke eria se ma weacng miting sac. Ke nga usruk pahol ah, nga puhla na kuh lah nga enenuh in sramsram nuh sel ac sang kahs in kahsrueh, ac nga siyuck sel lah el ac kuh in wiyuc ke tuhkweni ke lututacng in Sacnri ke lwen

tok ah ngan kuh in kahsrwel.

Tukun tuhkweni ke Sacnri sac, kuht eis pacl wowo in amuhtwactai. Kuht sramsram ke kunohkohn pucs-pucs lal ke orekma luhn prestuhn luhn stek. Ke kuht oruh ohinge ah, nga puhla mokleyuck in fahk nuh sel kuhtuh nuhnak nuh ke orekma luhn misineri ac ohiyac ma el ac mempucr lal kuh in kahsrh misineri ke pacl nuh kwewa ke orekma lalos ke eria lal. Nga etwacack tohkoh lah mukul se inge pruhe nuh ke kolyuck luhn ohiyac se inge. Nuh sel muhtwacta lasr pa sie mwe loh sacohk ma pruhe lal lohngyuck ac topukyuck. Miting na atacn tiac oacwac se pa inge tuhsruh sie suc nga etuh na suwohs lah kolyuck sin Nguhn ac sucu oasr eklac kac nuh ke moul luhn prestuhn luhn tistrik sac ac ohfohs lal, ke moul luhn mempucr lal, ac ke orwacrah wo luhn misineri we ah.

Tamuhlwel ac tahmtahel wiyuck an, srihpac luhn Leum uh kwacna oreklac ke kuht ahkos kolyuck luhn Nguhn. Nga luhlalfongi lah luhpan oruh lasr ke mokleyuck ac nuhnak ma tuhkuh nuh yohrohsr uh, pa luhpan luhlalfongi luhn Leum in orwacrah sap Lal.

Nga etwacrah lah, oacna ke nga fahk ke pweng met ah, nimet kohllah pihrihkyuck an. Ke sie mukwikwi ke yac somlah ah, nga kofkof ke Deseret Gym mah se fin acn Salt Lake City ke nga puhla mokleyuck se in som nuh ke University Hospital in muhtwacta yurin kawuck wowo se luhk suc ma koflah fahsr ke srihpen kacnsucr ac tukun el laslas ah. Nga suhlahklahk som liki yen in kofkof sac, nuk-nukyang, ac tiac paht nga kahsrh som in liye mukul wo se inge.

Ke nga fihli ke infuckihl lal ah, nga liye lah wacngihn mwet infuckihl sac. Ke nga siyuck we ah nga etwacack lah ngwac kuh in konwacwack ke yen in kofkof ke lohm ono ah, acn se ma orekmahnyuck nuh ke ahkpah luhn mahno. Nga konwacack lah pwacye. El sifacna pahtokollah ke mwe pahtpaht okwacrah ah ac el muhkweni ke rum sac. El oasr ke yen in kofkof sac, siskacn yen loal

ah. Nga pahnglol, na el pahtkolma ke mwe pahtpaht okwacrah ah in pwacng-ohk nuh sihk. Muhtwacta na wowo se kuht orwacrah, ac nga weluhl fohlohk nuh ke rum lal ah sang mwe in sewowo nuh sel.

Nga etwacack tohkoh sin kawuck se luhk ah lah yohk laloi lal ke lwen sac ac el nuhnkuh in sifacna eslah moul lal. El pruhe ke kahsrh tuhsruh el muhtwacwacack in puhla lah pruhe lal tiac topukyuck. El som nuh ke yen in kofkof sac ke nuhnak se ma muh pa inge ohiyac se in ahksahf-yelah suhpwacr yohk lal—in pah-toklah mwe pahtpaht okwacrah ah nuh ke yen loal ke yen in kofkof sac. Nga fihli ke pacl na elyah se, in topuk ke ma nga etuh ma mokleyuck sin God.

Kawuck se luhk ah moul ke yac pucspucs tohkoh—sesselah ke engan ac tarilac. Nga engan na pwacye in oruh sie mwe orekma luhn God ke lwen elyah se ke yen in kofkof sac.

Ke sie pac mukwikwi, ke Nga ac Tahmtahel Monson kahsrh nuh lohm ah tukun kuht muhtwacta yurin kawuck lasr ah, nga puhla nuhnak se kuht in som nuh ke acn mwet muhta we—loes kahsrh sac—in muhtwacta yurin sie katinmas mah-tuh suc tuh wi ward lasr ah. Inel pa Zella Thomas. Ke pacl sac el muhta ke lohm in muhta luhn mwet mah-tuh kuh mas. Ke tahfuhn lwen tok sac kuht konwacwack tuh el muh-nahslah na pwacye tuhsruh el oan wo ke mwe oan lal ah.

Zella el kun muhtahl ke pacl na loeloes, tuhsruh el sa na akihlacwack puhsracs. El siyuck lah nga kuh in sang mwe in sewowo nuh sel, weacng lah el ahkolah in misac Leum El fin luhngse elan fohlohk liki facluh. Oasr nguhn na wowo ac mihs ke infuckihl sac, ac kuht nuh kwewa etuh lah el ac tiac moul paht. Zella el sruokyac pouk ac fahk lah el oaru in pruhe tuh ngan tuhkuh liyac ac sang mwe in sewowo nuh sel. Nga fahk nuh sel lah kuht tuhkuh ke srihpen mokleyuck suwos tuhkuh sin Pahpah tuhmasr Inkuhsrao. Nga ngokyac motonsrol, etuh lah ngac tiac sifil liyac

ke kuht moul uh. Ma inge siyak tuh pwacye, el misac ke lwen tok ah. In kuh in sang kuhtuh ahkwo ac mihs nuh sel Zella wolacna pa mwe in sewowo se nuh sel ac nuh sihk.

Pacl wowo se in oruh mwe in sewowo nuh in moul luhn mwet sahyac kwacna tuhkuh ke tiac plwacniyuck. Ke sie fong in Sactte ohu na pwacye ke pacl in ohu ke yac 1983–84, Nga ac Tahmtahel Monson kahsrh ke lusacn mael ekahsr nuh ke ohl Midway, Utah, ma oasr lohm sesr we. Luhpan ohu ke fong sac oasr ke degree 24 ten liki sero Fahrenheit (–31°C), ac kuht ke etuh lah ma nuh kwewa wona ke lohm sesr ah we. Kuht liye lah ma nuh kwewa wo, na kuht mukwilac fohlohk nuh Salt Lake City. Kuht srwackna kahsrh nuh ke inkacnek luhlaph ah na stosah okwacsr ah misac. Kuht koflah in som nuh yen. Nga suhkwac mihsrihsr oacna ke fong sac.

Kuht tari na fahsr nuh ke acn ma oasr mwet we fototo ah, stosah uh kahsrh muhi ahliki kuht. Sahflahiyac ah stosah soko tui, ac mukul fuhsr se siyuck lacn kahsrh. Kuht konwacack lah tisucl nwek twacng in stosah okwacsr ah kwekwelah ke srihpen ohu, oruh kuht tiac kuh in kahsrhskihn. Mukul fuhsr kuhlwacng se inge wucn kuhtlac nuh lohm sesr Midway ah. Nga srihke ngan molwel ke kahsrh lal, tuhsruh el fohlohkihn. El fahk lah el Boy Scout se ac el luhngse oruh orekma in kuhlwacnsap. Nga ahkkahlwemyeyuc nuh sel, ac el ahkkahlwemye luhngse lal ke pacl wo lal in kahsrh. Nga motko muh el matwacn misineri, nga siyuck sel lah oasr plwacn lal in kuhlwacnsap ke misin. El fahk lah el tiac etuh na pwacye lah meac el ke oruh.

Ke lututacng in Mante tohkoh ah nga suhmuhslah lwacta se nuh sin mukul fuhsr se inge ac fahk kuloh nuh sel ke kuhlwacng lal. Ke lwacta sac nga ahkkweyael in kuhlwacnsap ke sie misin. Nga sang sie sin puk nuhtihk in welah ac ahkkohnyelah sapta se ke kuhlwacnsap luhn misineri.

Wik se tohkoh ah ninac kiyacn mukul fuhsr se pahngma ac fahk nuh sihk lah tuhlihk mukul se nahtuhl uh uhlihk mukul na yohk etuh la se tuhsruhk ke ohiyac ma sikyak ke moul lal, kena se el puhla ke pacl na loeloes in kuhlwcansap ke sie misin srihkweni. El fahk lah el ac pahpah tuhmwacl ah lalo ac pruhe tuh insiyacl in eklac. Elos fhliyac inel ke inen mwet in pruhe-kihnyuck ke Tempuhl Provo Utah ah. El finsrak tuh ke kuhtuh ohiyac, kuhtuh inkacnek, insiyacl in kuh in mokleyuck in wolac ac elan kuh in fohlohklac nuh ke kena lal in som misin ac kuhlwcansapuh Leum ke luhlalfongi. Ninac sac luhngse ngan etuh lah el liye ma sikyak ke ekuh ohu sac in oruh sie top nuh ke pruhe lalos nuh sel. Nga fahk lah, “nga insese nuh sum.”

Tukun mahlwem ekahsr ac ohsun puhs luhk nuh sin mukul fuhsr se inge, Nga ac Tahmtahel Monson yohk engan lasr in wi toeni in wihlkacs luhn misineri lal met liki el ac oaclac nuh ke Canada Misin Vancouver.

Yac tiac ma na orek kuht in ohsun ke fong in Tisacmpuh ohu sac? Nga tiac luhlalfongi. Sahyac na, nga luhlalfongi lah ohsun lasr ah pa top se ke oaru in pruhe luhn ninac ac pahpah nuh sin tuhlihk mukul elos seko.

Sulpacna, tamuhlwel ac tahmtahel wiyuck an, Pahpah tuhmasr Inkuhsrao el etuh enenuh lasr uh ac lac tuhfeh kahsrwe kuht ke kuht ac siyuck Sel ke kahsr uh. Nga luhlalfongi lah wacngihn elyah lasr ma srihklacac kuh wacngihn srihpac. Leum el elyah ke ma srihsrihk ke moul lasr uh.

Nga luhngse ahksahfyelah in kapsra sie puhlakihn ma tuhfehna sikyak suc ma oasr ikeyac sin mwet foko. Sikyak ke puhlan pacl in ahkfuhlwact ke ohiyac luhn acn ma orek nuh ke Tempuhl Kansas City, ke mahlwem na limekohsr somlah ah. Oacna in puhs ma sikyak ke moul lasr uh, ke pacl sac oacna in muh sie pac puhlakihn ma ma nuh kwewa ac fahsr wo. Tuhsruhktuh, ke nga etwacack ke ohiyac sikyak ke ahkfuhlwact ke ekuh met liki tempuhl aluiyucklac ah, nga akihlen lah ahkfuhlwact ke

fong sac sie liki na. Sahyacna, ma na wowo se.

Apkuhran in oacna ohiyac luhn acn nuh kwewa orek in oruh ip luhn akmuhsraiycn tempuhl, mwet fuhsr ke Tistrik Kansas City Missouri Tempuhl oruh atacn ahkfuhlwact lalos in sracliik u ke acn lalos sifacna. Plwacn sac pa elos ac tuhkweni nuh sie ke lohm luhlalp reniyucki luhn acn we ke lututacng in Sactte luhn ahkfuhlwact sac elos in kuh in etuh lah pacl suc ac oyac elos ac utyak we, acn elos ac tu we, lusacn inmahsr-lolos, ohiyacn tifoki nuh ke acn in tacn ah, ac kuhtuh pac sahyac—puhs ma srihsrihk kac ma elos enenuh in sruokyac ke puhlan pacl sac ke elos suc fosrngahkihn orwacni kain in mukwikwi nuh sie in muh lwen in tacn sac in kuh in oreklac wo.

Oasr ma na upac se ke lwen sac. Mukwikwi na fohn sac ac orek-makihn pohloh mukwikwi ma sruhuh ma ac ahkkahlwemyeyuck ke skrin luhlalp se ma pahngpahng Jumbotron. Pohloh mukwikwi sruhuh inge yohk srihpac na pwacye nuh ke mukwikwi na fohn sac. Elos tiac srihke in kapsreni muhkweni nuh sie, tuhsruhk kais sie pohloh petsac sruhuh ac ahkkahlwemye mukwikwi se tohkoh an. Petsac ke pohloh mukwikwi uh yohk srihpac in oruh mukwikwi na fohn sac in oasr kalmeyac. Ac Jumbotron sac tiac orekma.

Mwet orekma kac ah fohs in konwacack elyah sac ke mwet fuhsr ah tuhpan, foko selos, kahinglac pacl wowo lalos in srihkasrak. Ohiyac sac luhman ac tiac oreklac.

Mwet se ma suhmuhslah ah ac mwet se ma kol ahkfuhlwact sac, Susan Cooper, tohkoh ahkuhtweyac lah, “Ke kuht moklwe plwacn se emet ah nuh ke ahkluo ac plwacn puhs tohkoh ah, kuht etuh lah ac tiac orekma. . . . Ke kuht liye fahsr luhn akwuck ah, kuht etuh lah kuht ac tiac kuh in orwacalah, tuhsruhkuht etuh lah oasr sie sin ma yohk kuh la ke acn in tacn ah ten—3,000 ke mwet fuhsr. Kuht enenuh in som nuh ten ac fahk nuh [selos] ma sikyak uh ac

orekmakihn luhlalfongi lalos.”³

Ao se na met liki mwet in intoo uh ac muhtwacwacack utyak nuh ke acn luhlalp se, 3,000 ke mwet fuhsr inge sikuck muhtuhnte infohk ah ac tuhkweni pruhe. Elos pruhe tuh elos suc orekma ke Jumbotron sac in mokleyuck in etuh ma in oruh in ahksuwahsy; elos siyuck sin Pahpah tuhmwaclos Inkuhsrao in ahkfalyelah ma elos tiac kuh in orwacalah ke srihpen srihklac luhn pacl uh.

Sie mwet ma suhmuhslah uh fahk tohkoh, “Pa pruhe se ma mwet fuhsr ah tiac kuh in muhkuhnlah, tiac ke srihpen kwekwe luhn falfucl sac, tuhsruhkuht ke srihpen elos puhla yohk ke Nguhn.”⁴

Tiac paht met liki sie sin mwet orekma kac ah tuhkuh in fahk nuh selos lah elos sokwack elyah sac ac eltahl orwacalah. El fahk lah elos wo ohiyac kuh in konwacack elyah sac, tuhsruhkuht mwet fuhsr ah kwewa etuh wo ke ohiyac sac.

Ke kuht ilyak nuh in lohm luhlalp luhn mura sac ke ekuh sac, wacngihn etuh lasr kac lah elos puhlakihn kwewa ma upac ke lwen sac. Tiac paht elos muhtwacwacack ke mukwikwi lalos. Ma kuht liye ah, arulacna kahto, fwel oruh sac—sie sin ma wowo nga liye. Mwet fuhsr ah suhpwaclihkuht nguhn wowo, kuh ma puhlewuyuck selos kwewa ma oasr lun lohm sac. Elos etuh na acn elos ac utyak we, acn elos ac tu we, ac ohiyacn oruh lalos nuh sie. Ke nga etwacack lah fototo pacl in srihkasrak lalos ac lah puhsiyacn ma orek ah tiac srihkeyuck sin u sac nohfohn, nga lut na pwacye. Wacngihn mwet ac kuh in etuh kac. Pwacye lah Leum el ahkfalyelah ma suhfal.

Nga tiac tui in luhngse yohk ke ohiyac Leum el kuh in mokle ac kol ip nuh kwewa ke tohkohsrahi Lal ac inge oasr na pacl in sang mokleyuck nuh ke kais sie mwet—kuh sie ahkfuhlwact ke ohiyac luhn acn se kuh sie Jumbotron. Ma pwacye se ma El kuh, lah El oruh, pa fahkwack luhlalfongi luhk uh.

Tamuhlwel ac tahmtahel wiyuck an, Leum pa ip ke moul lasr uh. El luhngse

kuht. El ke ahkinsewowoye kuht. El luhngse kuht in suk ke kahsrh Lal. Ke El pwen kuht ac kol kuht, ac ke El lohng ac topuk pruhe lasr uh, kuht ac konwacack engan yenuh ac inge ma El kena nuh sesr uh. Lwelah kuht in etuh ke mwe insewowo Lal in moul lasr uh, nga pruhe ke inen Jisus Kraist, Mwet Lahngo lasr, amen.

MWE KAHSRUH

1. Liye 2 Nephi 2:25.
2. Liye Doctrine and Covenants 112:10.
3. Susan Cooper, ke Maurine Proctor, "Nothing's Too Hard for the Lord: The Kansas City Cultural Celebration," *Meridian Magazine*, Mei 9, 2012, ldsmag.com.
4. Proctor, *Meridian Magazine*, Mei 9, 2012.

Luti ke Pacl Lasr uh

Lesin luhn Melchizedek Pristut ac U luhn Muhtwacn in Kahsrh ke Sacnri ahkahkosr uh tuhfeh orek ke "Teaching for Our Time." Kais sie lesin kuh in ahkoeyucklac ke soko sramsram kuh in puhs liki ma orek ke toeni luhlahp ma tuhfehna tari ah. Prestuhn luhn stek kuh tisrik kuh in sulaclah sramsram ma in orekmakihnyuck uh, kuh elos kuh in sang kunohkohn se inge nuh sel pisap ac prestuhn luhn pracns. Mwet kol uh enenuh in ahkkahlwemye yohk srihpen mukul ke Melchizedek Pristut ac tahmtahel ke U luhn Muhtwacn in Kahsrh uh lutlutkihn sramsram sacpacna ke Sacnri sacpacna.

Elos suc wi lesin ke Sacnri-ahkahkosr ah ahkkweyeyuck in lutlutkihn ac use nuh ke kuhlahs mackuhsin ke toeni luhlahp ma tuhfehna orek uh.

Ma tohuyak nuh ke ahkoeyacn Lesin se ke Sramsram uh

Pruhe tuh Nguhn Muhtahl fah wi kowos ke kowos e lutlutkihn ac luti sramsram (uh). Kowos kuh

in srihfucsryuck in orekmakihn kuhfa sahyac in ahkoo lesin an, tuhsruhk sramsram ke toeni uh pa ohiyacn luti se ma ahkkweyeyucklac uh. Kunohkohn lowos an pa in kahsrh mwet sahyac in etuh ac moulkihn wosacus uh ke lutyuck ke toeni luhlahp luhn Alu uh ma tuhfehna orek uh.

Sifil liye sramsram uh, liye ke ip yohk ac mwe luti ma sun enenuh luhn mwet ke kuhlahs an. Suk pac ke pohloh sramsram, ma kahlwem ke ma suhmuhlah, ac pohloh fahk ke sramsram uh ma ac fah kahsrwe kowos luti ma pwacye uh.

Oruh sie tahk an ke ohiyacn luti ke ip yohk ac mwe luti uh. Nuhnkuh in sang kihsen siyuck ma kahsrh mwet ke kuhlahs an:

- Suk ke ip yohk ac mwe luti ke sramsram uh.
- Nuhnkuh ke kalmeyac lalos.
- Akacsruih ke etuh, mwe nuhnak, ma puhlakihnyuck, ac fahkwack luhlhlhlongi an.
- Orekmakihn ip yohk inge ac mwe luti uh ke moul lalos an.

MAHLWEM MA LESIN UH LUTUYUCK	KUHFA LUHN LESIN KE SACNRI-AHKAHKOSR
Ohktohpa 2012–Eprel 2013	Sramsram oreklac ke toeni luhlap ke Ohktohpa 2012*
Eprel 2013–Ohktohpa 2013	Sramsram oreklac ke toeni luhlap ke Eprel 2013*

**Nuh ke lesin ke Sacnri ahkahkosr ke Eprel ac Ohktohpa an, sramsram uh kuh in sulohsohllah ke toeni orek met ah kuh ke ma tuhfehna tari ah. Sramsram inge oasr ke kain kahs pucspucs ke conference.lds.org.*



Sel President Dieter F. Uchtdorf

Mwet in Kahsrh Ahkluo ke Prestuhnsi Se Met

Ke Auli ac Eklac Wo

Lutlutkihn kuhfa inge ac, ke pacl fal, sramsramkihn yurin tahmtahel ma kowos muhtwacta nuh yohroh an. Orekmakihn kihsen siyuck an in kahsrwe kowos ahkkweye tahmtahel wiyowos an ac in oruh Rilif Sosaiti in ip utuftuf se ke moul lowos sifacna an. Nuh ke kuhtuh pac ma in etuh, som nuh ke www.reliefsociety.lds.org.

Ke Auli

Prestuhn Monson, kuht luhngse kom. Kuloh ke mwe fahkwack ma mokleyuck ac wolacna ke muhsah luhn tempuhl sasuc ac kuhlwacnsap luhn misineri. Ke srihpen ma inge, nga etuh na pwacye lah mwe inewowo yohk ac fah tuhkuh nuh yohrohsr ac nuh sin fihl pucspucs tohkoh.

Tamuhlwel ac tahmtahel sacohk wiyuck, kawuck sacohk wiyuck! Kuht nuh kwewa moul. Nga finsrak ma inge in tiac ahklutye kuhtwena mwet.

Wacngihn sesr ac fah muhta arlac paht fin facluh. Oasr kuhtuh yac yohk srihpac lasr, suc, ke liye luhn ma pahtpaht, oacna sie sahrlah luhn muhta.

Na kuht som. Nguhnsar som nuh ke lohm sin God suc use moul lasr.¹ Kuht fihliyac mahnosr nuh inkucluyuck uh ac kuht som liki ma luhn facluh ke kuht som nuh ke acn se tohkoh luhn inkacnek pwacye lasr.

Ke kuht fuhsr uh, oacna in luhman kuht ac moul pahtpaht. Kuht nuhnkuh lah oasr lwen pucspucs in

tuhkuh, ac ma soenna sikyak luhma oacna inkacnek suwohs lah tiac ahksahfyelah.

Tuhsruhktuh, ke kuht mahtuhlah, kuht muhtwacwacack in akihlen ac ahklutyeuyuck ke fototoiyacn inkacnek uh. Kuht motko lah yac uh sa som fuhkah. Ac kuht muhtwacwacack in nuhnkuh ke sulwacnah lasr kuht orwacnah ac ma kuht orwacnah tari. Ke ma inge, kuht esam pacl wowo ma use ahkfucsrufcsryeyuck nuh nguhnsar ac engan nuh insiyacsr. Tuhsruhktuh kuht oacyacpac esam auli uh—ma kuht finsrak kuht in kuh in fohlohk ac ekuhllah.

Nurse se suc karihngihn mwet suc ac misac fahk lah el kwacna siyuck kihsen siyuck fihsracsr se ke mwet mas lal suc ahkoeyucklac in som liki moul se inge.

“Oasr kuhtwena alui lom?” el ac siyuck.²

In oasr fototo nuh ke lwen sahrhah luhn moul uh kwacna use ahknwacsnwacsyeyuck ke nuhnak

uh ac liyeyuck wo. Na ke mwet inge siyuckyuck ke auli lalos, elos ikacslah insiyaclos. Elos esamwack ke ma elos ke ekuhllah elos fin kuh in fohlohkihn pacl uh.

Ke nga motko ke ma elos fahk uh, nga lut ke ohiyacn ip yohk ke wosasuc luhn Jisus Kraist kuh in oruh fahsr luhn moul lasr nuh ke ma wo, kuht fin ac oruh ma inge.

Wacngihn ma lukmac ke ip yohk luhn wosasuc. Kuht lutlutkihn ke ma suhmuhslah, kuht sramsramkihn ke Sacnri Skul, ac kuht lohng tari sin mwet sramsram nuh sesr. Ip yohk ac ohiyac wo ma tuhkuh lucng me pa suwohswohs ac kahlwem; elos kahto, yohk, ac fokoko; ac elos kuh in kahsrwe kuht in wacngihn auli ke moul lasr uh.

Nuhmuha Ngan Sislah Pacl Yohk yurin Mwet Nga Luhngse

Sahp inkaiyacn auli ma mwet mas muhnahtlah uh fahk uh pa elos nuhmuha elos in sislah yohk pacl lalos yurin mwet elos luhngse.

Mwet uh ahkkahlwemye puhla luhn ahsor se inge: elos “auli yohk ke elos sislah pacl yohk lalos lwen nuh kwewa nuh ke inkacnek luhn . . . orekma.”³ Puhs selos wacngihn pacl wo la in eis mwe esam sacohk ma tuhkuh ke sislah pacl la yurin sucu ac kawuck lalos. Elos tiac eis pacl wo in muhsahi sie kuhpahsr wo nuh sin mwet suc yohk kalmeyac nuh selos.

Yac tiac pwacye lah kuht kwacna kahfofo? Ac, mwe ahsor in fahk lac, kuht ahkfuhlwactye kahfofo lasr uh, oacna kahfofo, nuh se sifacna, pa sie ma orek wo kuh akucl luhn moul wolacna.

Pwacye?

Nga nuhnkuh ke Leum ac Mwe Srihkasrak Wowo, Jisus Kraist, ac moul fototo Lal yurin mwet Galilee ac Jerusalem. Nga srihke in motko Elan suhlaklahk inmahsrton miting kuh ke kain in oruh ma suhlaklahk ma oasr ke tahk in ma in oreklac.

Nga tiac kuh in liyacack.

Sahyacna nga liye pahkotwen ac luhngse Wen nuhtin God moulkihn ke kais sie lwen ke sie srihpac. Ke El muhtwacta yurin mwet Siskacl, elos puhla yohk srihpac ac luhngse. El etuh ma yohk srihpac nuh sin mwet suc El ohsun nuh se. El ahkinse-wowoyaclos, ac karuhnguhnuhlos. El sruhkuhlosyak, ac ahkkweyaclos. El sang mwe sang sacohk luhn pacl Lal.

Ke pacl lasr uh, fihsracsr in oruh in muh kuht sislah pacl yurin mwet sahyac. Ke itucngyac luhn computer uh kuht kuh in "tuhkweni" yurin tausin ke "kawuck" in tiac angwetwacni nuh sin kais sie selos. Technology kuh in ma wolacna se, ac wo nuh ke pacl ma kuht tiac kuh in fototo nuh yurin mwet kuht luhngse an. Nga ac muhtwacn kiyuck uh muhta loessuhlah liki mwet ke sucu sacohk lasr; kuht etuh ohiyacn ma inge. Tuhsruhktuh, nga luhlhlfongi lah kuht tiac fahsr ke inkacnek suwohs, kais sie ac in ekihn sie u, ke kuht in ohsun yurin sucu ac kawuck lasr uh pa in sruhkwick petsac tahfuhn kahs nuh ke internet, tahfwelah nuh selos sahyac email wacngihn srihpac tuh tahfuhn kahs, kuh sang mwet kuht luhngse an nuh ke site luhn Internet. Nga muh oasr acn ke mukwikwi se inge, tuhsruhktuh puhtaklah pacl kuht ke sislah kac uh? Kuht fin tiac sang pacl yohk lasr sifacna ac tiac orwaclihk pacl nuh ke ma yohk srihpac na pwacye nuh sesr uh, sie lwen kuht ac auli kac.

Lwelah kuht in orwaclah in ahk-fuhlwactye mwet suc kuht luhngse, sislah pacl yohk kalmeyac nuh selos, oruh ma tuhkweni, ac orwaclah mwe esam wowo.

Nuhmuhna Ngan Moulkihn Kuhiyuck ah

Sie pac mwe auli luhn mwet pa elos tiac sun mwet se elos puhla elos kuh

ac enenuh in oruh. Ke elos nuhnkuh ke moul lalos, elos akikhlen lah elos tiac moulkihn nuh ke ma elos kuh, lah ma pucspucs tiac ahksahfyeyucklac.

Nga tiac sramsram inge ke fanuhk-yacn mwe fan luhn orekma wo ke orekma lasr. Orekma se inge, finne luhman yohk ke facluh se inge, pa ma srihk ke kowos liye fuhfahsryucsr luhn ma pahtpaht ma soano kuht.

Tuh, nga sramsramkihn in sun mwet se ma God, Pahpah tuhmasr Inkuhsrao, el kena kuht in sun.

Kuht tuhkuh nuh facluh se inge, oacna mwet sihm se fahk, "us wolacna yohk"⁴ ke sie facluh met ah.

Pahpah tuhmasr Inkuhsrao el liye ma kuht kuh in oruh. El etuh ma nuh kwewa kacsr finne ma kuht nihkihn. El kai kuht ke moul lasr in ahkfalye moul lasr, in moulkihn sie moul wowo, ac fohlohk nuh ye Muhtahl.

Na, efuh, kuht sang yohk pacl ac kena lasr nuh ke ma lusrohngtwen, ma srihk, ac ma suhloal? Kuh kuht sruhnga liye ke kuht oasr ke inkacnek lusrohngtwen ac tiac yohk srihpac?

Yac e tiac lahlmwetmwet in "elohsack mwe kahsrup nuh suwos [inkuhsrao], yen watihl ac ras [tiac] kuhnaoslah, ac mwet pihsrapasr elos [tiac] kuhnaoslah acn ma oan we ac pihsraclah"⁵

Kuht oruh ma inge fuhkah? Ke ukwe srihkasrak luhn Mwet Lahngo, in moulkihn mwe luti Lal ke moul lasr uh lwen nuh kwewa, ac luhngse suwohs God ac mwet tuhlan lasr.

Kuht tiac kuh in sun mwet tuhma lutlut kuht fin tohrkahskahs ke ma kuht enenuh in oruh uh, kuh motko ke pacl uh.

Ke moulkihn wosasuc an, kuht enenuh in tiac oacna tuhlihk mukul se ma isongyac kufun niyacl ke kof an ac fahk muh el som kofkof. Ke srihpen kuht pa tuhlihk nuhtin Pahpah tuhmasr Inkuhsrao, kuht kuh in oruh yohk likina. Ke ohingacn, luhngse oruh uh suhfal. Kuht enenuh in *oruh*. Yohk srihpac likina inge, kuht enenuh in *oacna* ma Pahpah Lucng El kena kuht in oruh uh.

Fahkwack luhlhlfongi lasr ke

wosasuc pa wo uh, tuhsruhktuh moulkihn sie srihkasrak suwohs ke wosasuc fohlohkihnuyuckyak pa wo likina. Finsrak in luhlhlfongi yohk ke olwelah lasr uh pa wo; tuh in oaru ke olwelah muhtahl—wi moulkihn moul nwacsnwacs, moli sie tahfuh singucul, karihngihn Kahs in Lahlmwetmwet, ac kuhlwacnsap nuh sin mwet suc enenuh pa wo likina. Fahkwack lah kuht ac sang pacl yohk nuh ke pruhe in sucu, lutlut ke ma suhmuhslah, ac oruh mukwikwi pwacr yurin sucu pa wo; tuhsruhktuh in oaru in oruh na pwacye ma inge ac fah use mwe in sewowo luhn inkuhsrao nuh ke moul lasr uh.

Mwet tuhma lutlut pa srihke in oasr ohiyac muhtahl ac engan. Pa sie inkacnek nuh ke ohiyacsr suwohs ac engan.

Lwelah kuht in sulwaclah in ukwe Mwet Lahngo ac oaru ke orekma in sun mwet se kuht orweyucklac in oacna. Lwelah kuht in lohng ac ahkos mokleyuck luhn Nguhn Muhtahl. Ke kuht oruh ohinge, Pahpah Lucng lac fah ahkkahlwemye nuh sesr ma kuht nihkihn kacsr sifacna. El ac ahkkahlwemye inkacnek uh ac kol kuht in liye ma kuht nihkihn ac sahp talan ma tiac motkweyuck.

Ke kuht sang pacl yohk nuh ke sokwack luhn ma muhtahl ac engan, kuht tiac fahsr ke inkacnek luhn auli. Luhpan luhlhlfongi lasr ke kuhlwacng luhn Mwet Lahngo, pa luhpah se kuht ac puhla kuht oasr kac ke inkacnek soko ma Pahpah tuhmasr Inkuhsrao kena kuht in fahsr kac.

Nuhmuhna Ngan Lwelah Ngan Engan Likina Met Ah

Sie pac mwe auli se sin mwet suc etuh elos ac misac sahp ac fah ahklutye kuht. Elos nuhmuhna elos in lwelah elos in engan likina met ah.

Kuht kwacna nuhnkuh lah oasr ma se soanwekuht ke pacl fahsr uh lah ac fah use engan yohk: ohiyacn sucu wo likina, ohiyacn ip luhn mani ma wo likina, kuh sahfahiyacn srihke luhn ma upac.

Ke kuht mahtuhlah, kuht liye moul lasr uh ac akihlen lah ma sikyak raun-ikuhtlac tiac yohk srihpac kuh oruh engan lasr uh.

Kuht yohk srihpac. *Kuht* sulwacalah engan lasr uh.

Kowos ac nga pa mwet suc sulacalah engan lasr sifacna uh.

Muhtwacn kiyuck, Harriet, ac nga luhngse kahsrühr ke pwacskuhl okwacsr ah. Ma na wolacna se in liye kahtoiyacn acn uh. Oasr inkacnek ma kuh luhngse na pwacskuhl kac, tuhsruhkuht tiac lohacng nuh kac lah fuhkah loesiyac ac muhiyacn kahsrühr lasr uh liki na mwet pwacskuhl sahyac ah.

Tuhsruhktuh, kuhtuh pacl uh nga nuhnkuh kuht in akuhtuhn. Nga muh kuht kuh in ahkphotoye pacl lasr uh kuht fin lihksreni kahsrühr. Na kuhtuh pacl uh nga tahfonglac fahk nuhnac se inge nuh sin muhtwacn wolacna se kiyuck.

Atacn topukyac sel ke ohiyac se inge kuhlwaeng, kahlwem, ac suwohs nuh pwacye pacl nuh kwewa. El isracr srihsrihk ac fahk, “Dieter, tiac akuhtuhn se; fuhfahsryucsr se. Engankihn pacl uh.”

Fuhkah pwacyeyacl!

Kuhtuh pacl uh ke moul uh, kuht lohacng yohk in ahksahfyelah sie ma oruh kuht tiac konwacack engan ke fuhfahsryucsr uh. Nga tiac som wi muhtwacn kiyuck ah pwacskuhl ke srihpen nga rahrah in ahksahfyelah. Nga som ke srihpen puhlakihn se in weluhl uh wo ac pwac.

Yac tiac atacn lahlfon in tiac puhlakihn mukwikwi pwac ac engan ke srihpen kuht tiac tui ke tuhpanyacn pacl se e sahflah uh?

Kuh kuht lohng on kahto in soano nuh ke not sahflah in ahksahfyelah tukun kuht engankihn na pwacye uh? Moh. Kuht lohng ma selacna ke on uh, ac engankihn on nohfohn an.

Kuh kuht fahk pruhe lasr uh ke “amen” muhkwenah kuh sahflah ke nuhnac lasr uh? Kuht tiac. Kuht pruhe in fototo nuh yurin Pahpah tuhmasr Inkuhsrao, in eis Nguhn Lal ac puhla luhngse Lal.

Kuht tiac enenuh in soano in puhlah engan ne ke na kuht sun kuhtuh srihpac tok an, in konwacack lah engan uh oasr tari—pacl nuh kwewa! Tiac kalmeyacn moul uh pa in luhngkihn in nuhnkuh ke ma somlah. “Pa inge lwen se suc Leum God El orwacalah . . .,” Mwet Suhmuhsrah sihmih. “Lwelah kuht in engan ac ahkfuhlwactye.”⁶

Tamuhlwel ac tahmtahel, tiac yohk srihpac ke ohiyacsr, kuh mwe srihfe kuh upac lasr, oasr sie ma ke kais sie lwen in engankihn ac luhngse. Oasr sie ma ke kais sie lwen ma use srui ac engan kuht fin liye nuh ac luhngse ma sacn.

Sahp kuht enenuh in tiac liye ke muhtahsr ac yohkiyac ke insiyacsr. Nga luhngse mwe fahk se: “Mwet se liye suwohs ke at lal muhkwenah. Ma yohk srihpac tiac kuh in liyeyuck ke muhta.”⁷

Kuht sapkihnyuck in “sang kuloh ke ma nuh kwewa.”⁸ Na wo likina in liye ke muhtahsr ac insiyacsr ma srihk kuht *kuh* in kulohkihn kac, likina tiac ahkyohkye ma koluk ke pacl se inge?

Leum el olwelah lah mwet se ma eis ma nuh kwewa in kulohkihn fah ahkfuhlwactyeyuck, ac ma luhn facluh fah ituckyang nuh sel ke pacl siofok yohk liki.⁹

Tamuhlwel ac tahmtahel, ke mwe insewowo yohk sin Pahpah tuhmasr Inkuhsrao, plwacn kuhlwaeng luhn molwelah Lal, ma pwacye yohk ke wosacuc fohlohkihnyuckyak, ac ma kahto pucspucs ke fuhfahsryucsr luhn moul inge, “tuh pwacye lah oasr srihpac in engankihn?”¹⁰

Lwelah kuht in engan, finne ke ohiyac sikyak nuh sesr uh.

Ke Eklac Wo

Sie lwen kuht ac fahsr nuh ke moul tohkoh likina moul se inge ke facluh se inge. Sie lwen kuht ac liye moul lasr uh ac motko kuht fin kuh in oruh wo likina, sulwacalah wo likina, kuht orekmakihn pacl lasr uh wo likina met ah.

In eslah kuhtuh auli yohk inge luhn moul, tuh enenuh in

lahlmwetmwet in oruh kuhtuh sulwacalah wo mihsenge. Pwacnwacng, lwelah kuht in:

- Akiyac in sislah yohk pacl yurin mwet suc kuht luhngse.
- Akiyac in srihke in oaruyak kuhtuh in oruh sie mwet suc God El luhngse kuht in oacna.
- Akiyac in sokwack ohiyacn engan, finne ke ohiyac sikyak nuh sesr uh.

Pa fahkwack luhlhlfongi luhk lah puhs sin auli yohk lutu uh kuh in karihngihnyuckyang in ukwe Mwet Lahngo mihsenge. Kuht fin oruh ma koluk kuh tahfonglac—kuht fin orwacalah sulwacalah muh kuht inge auli—oasr mwe sang se ke Iwacalah luhn Kraist, tuh kuht kuh in eis nuhnac muhnac kac. Kuht tiac kuh in fohlohk nuh ke pacl met ah ac ekuhllah pacl somlah ah, tuhsruhktuh kuht kuh in auliyak. Mwet Lahngo el kuh in eslah puhla lasr luhn auli¹¹ ac eslah ma toasr luhn ma koluk lasr.¹² Iwacalah Lal lwelah kuht in som liki ma sikyak tari ac fahsr nuh met ke paho nwacsnwacs, insiyac nwacsnwacs,¹³ ac moniyuck se in oruh wo liki ac yohkiyac na in wolac.

Ahok, moul se inge muhi; lwen lasr uh atacn sana eflah; ac misac use puhla sahngweng ke kuhtuh pacl uh. Tuhsruhktuh, nguhn lasr fah tahfwelah in moul ac sie lwen fah sulpac moulyak ke mahno suwohs in eis moul ma pahtpaht. Nga fahkwack lah ke srihpen Kraist suc pahkomuhta, kuht ac sulpac moul ma pahtpaht. Ke srihpen Mwet Lahngo ac Mwet in Molwelah lasr, sie lwen kuht ac kahlwemwack na pwacye ac engankihn kalmacn kacs inge “kweok luhn misac itucklac sin Kraist.”¹⁴

Inkacnek nuh ke ahkfalye wolacna lasr ke tuhlihk nuhtin God pa sie ma pahtpaht. Tamuhlwel ac tahmtahel sacohk wiyuck, kawuck sacohk, kuht enenuh in fahsr ke inkacnek pahtpaht se inge *mihsenge*; kuht tiac kuh in lwelah sie lwen in wacngihn srihpac. Nga pruhe tuh kuht in tiac soano nuh ke pacl kuht ahkolah in misac

met liki kuht etwaclah na pwacye
in mou. Ke ine muhtahl luhn Jisus
Kraist, amen.

MWE KAHSRUH

1. Liye Alma 40:11.
2. Liye Susie Steiner, "Top Five Regrets of the Dying," *Guardian*, Fepweri 1, 2012, www.guardian.co.uk/lifeandstyle/2012/feb/01/top-five-regrets-of-the-dying.
3. Bronnie Ware, in Steiner, "Top Five Regrets of the Dying."
4. "Ode: Intimations of Immortality from Recollections of Early Childhood," *The*

Complete Poetical Works of William Wordsworth (1924), 359.

5. Mattu 6:20.
6. Psalm 118:24.
7. Antoine de Saint-Exupéry, *The Little Prince*, trans. Richard Howard (2000), 63.
8. Liye Mosiah 26:39; liye pac Doctrine and Covenants 59:7.
9. Liye Doctrine and Covenants 78:19.
10. Liye Alma 26:35.
11. Liye Fwackyuck 7:17.
12. Liye Mattu 11:28–30.
13. Liye Psalm 24:4.
14. Liye Mosiah 16:8; liye pac 1 Mwet Korint 15:54.

© 2012 sel Intellectual Reserve, Inc. Kuh ac suwohs nuh kwewa fihliyucki. Sihmlac fin acn USA. Ahkkweyeyucklac ke kahs English: 6/11. Ahkkweyeyucklac ke lweng: 6/11. Lwenglah luhn *Visiting Teaching Message, November 2012*. Kosraean. 10371 868